

四庫全書

集部

欽定四庫全書

盤洲文集卷五十四

宋 洪适 撰

啟三

代廣東帥屬謝帥啟

問津黃木之灣甫窺官海竄籍紅蓮之府仰泛恩波即尸素以懷憂敢殺青而通謝伏念某稟生椎魯探道艱難拜千佛之經莫能趾美聯五星之集有愧齊稱學書

既已不成為器遂同無用濫塵官簿空積歲躔因定省
于親闈遂徘徊于炎嶠歎庸材之牆面筮臚仕以灰心
臨淵羨魚初覬叢祠之末秩乞漿得酒乃叨戎幕之下
陳徒誦過庭之詩未閑作吏之事惟片長可勝任使奈
狹見不足激昂非賴包容難逃汰斥恭惟某官雕龍傳
學雌霓垂光蜚妙譽于簪紳補嘉謨于帷幄課先撫字
聿高使竹之分志在澄清克受皇華之遣荐佩十連之
寄歷提五管之封里詠塗歌已洽袴襦之樂山行海宿

寂無枹鼓之鳴宜錫詔綸入持從橐豈令賤子久託餘
輝某率爾彈冠欣然望履見父之執方自躍于鑪錘御
衆以寬願少私于轡策

代高要丞上鄭太守啟

餬口四方妄發彈冠之請庇身大邑叨居涉筆之官正
結想于高牙輒露情于小牘伏念某學初茅塞識遂棗
昏語寧反于三隅能不名于一藝白駒過隙雖抱子以
何知黃金滿籬在傳家而有忝亦嘗諾仕纔得奉祠方

九重天遠念于澤南故萬戶縣皆為之立貳首令攝事
未通為政之經足以送窮不勝負公之媿趨趨欲進瘵
曠是憂仰庇卿雲豈無道地此蓋某官鵬圖擊海鶴瑞
鳴臯獨鍾喬嶽之暉共推清廟之器荐都顯職大播休
聲瑞既協于夢刀仁即揚于贈扇葱葱王者之氣夙重
潛藩廩廩君子之風聿追顯祖惟陂量兼容于弱吏庶
鰥生得視于聾丞某整楫非遙執鞭可冀自思牛馬之
走無所取材甫親鴈鶩之行敢不盡力

代封州簽判謝帥啟

餬口遐方妄發彈冠之請庇身近郡叨為入幕之賓仰
戢厚恩敢通小牘伏念某學初茅塞識遂棗昏語寧反
于三隅材不名于一藝白駒過隙雖抱子以何知黃金
滿籬在傳家而有忝亦嘗卜仕纔得奉祠頃辱外臺俾
丞大邑偶黃茅之感瘴致行李以愆期仰惟元老之尊
獲遇丈人之行進瞻步武幸披霧于公庭曲賜齒牙遂
回春于寒谷殆類塞翁之失馬自驚龍伯之得鼃惟有

感銘莫知論報此蓋某官包羅間氣貫綜多聞闕紫闥
之榮途贊黃樞之密議始居輔地無庶民愁恨之聲暨
擁使軺有天下澄清之志遂臨八桂即詠兩岐旋出綽
于西垣廼建麾于東廣寬猛相濟茂懷市虎之疑剖決
如流不事淵魚之察俯憐窮蹇遂致僥逾某敢不虔畏
簡書力鞭駑鈍量長校短遂無尺寸之能抱公減私或
覲涓埃之報

代謝吏部李侍郎啟

把麾五嶺已消西道之聲出綽九重復玷東偏之寄裝
懷增懼揣分知歸伏念某業守青箱用慚赤箭賣刀買
犢荐辜銅虎之分輓粟飛芻未達木牛之運牧人久矣
奏課缺然恐獲戾于備員忽拜恩而更治仍躋延閣併
寵衰蹤此日集衙無聞名之龍戶他時報政空貽辱于
羊仙僥倖如斯吹噓有自此蓋某官量侔山藪識蘊著
龜蚤知藉稻之文獨富粲花之論主刑仁恕議者謂過
于張典選清平人曰後有盧李夙懷推輓共賴主盟惟

曲賜于品題致連叨于任使某自閱星躔之觀屢驚斗柄之移軟水易心益厲吳公之操薄征踈目仰師韓子之言

宮使梁尚書啟

某官生逢慶會譽滿華塗有燭照龜卜之明兼地負海涵之量得劉晏之取予任蕭公之轉輸足用地官斗筭之徒何算也伸威天府銖兩之奸皆知之蚤聯職于寶儲暫均休于珍館獨司推挽共賴主盟載惟鼠技之窮

夙受鶚書之薦傳之羽翼賜以齒牙獨私華袞之榮猥
遇高山之聽致叨任使盡出吹噓某敢不拔薤抑強酌
泉厲操可繼宋璟盧真伏仰前芳失之子羽宰予益慙
厚遇

福州張侍郎啟

某官量賦登閣識周貫變味道腴于七略包文體于百
家曲臺高稷嗣之除起部造郎潛之列益崇晝接疊慶
歲遷內舞舜干仰仁天而簪筆出懷蘇印洽惠露以隨

車積有功能著于中外撞牙桂管嘗復借于寇君徙節
閩川歌晚來之賈父自顧散樗之質夙遊棲鳳之林惟
接武之好尤深故推轂之言益過致叨推擇有辱品題
某心係重階誠殫小牘準程前哲欲厲操于貪泉寤寐
清規庶免愆于宦海

回李惠州啟

伏審懷章去國式臨瓜戍之期森戟專城將快棠陰之
頌遐萌相語慈父斯來伏惟某官德宇粹溫風規高劭

蚤擢奉常之第宜居著作之庭既荏苒于歲年尚棲遲
于簿領以名字而典郡允得循良有方略以為民自然
富庶治行聿追于召杜歡聲將軼于羅浮某頃接班聯
浸睽顏采方喜戒途之報已勤削牘之音書細十行即
遠頒于褒詔河潤九里猶少借于餘波

問李虔州啟

把麾五嶺已消西道之聲出綈九重復玷東偏之寄甫
恭朝夕遙問寒溫某官學富家傳言推世則自奉專城

之寄遂深當宁之知刺史省以六條夙稱桂海天下號
曰八俊益振荆湘來司章貢之權兼用黃韓之化紀綱
大舉謳頌載騰為官乎為私乎變貪殘于一問行山者
行澤者熄椎剽之羣驚治已疏于御屏寵將持于從橐
某受材甚下任職無長方軫慮于譴呵忽冒榮于推擇
退惟僥倖端出品題念平生雲霧之披獨彼此參辰之
濶雖烹魚狎至有踰從事之賢而覩鳳後期未降君子
之見每遡洄而結想空蹈景以興懷比獲守于郡封廼

密切于隣寶相依唇齒願投分于蘭金敢布腹心幸攄
誠于藥石

謝溫南劒啟

把麾五嶺已消西道之聲出綈九重復玷東偏之寄顧
薄材而知懼枉榮問以增慚此蓋某官學博書倉識窮
理窟蚤擢奉常之第旋陪中秘之遊武城之策二三盡
讎謫謬捷為之磬十六能考異同已垂上于雲霄迺遠
分于符竹物華天寶龍神潛合劒之津里詠塗歌黃犢

化佩刀之俗夙保歲寒之契獨私月旦之評遂致迂踈
猥叨推擇某睽離久矣瞻邇眷然書記翩翩若高談之
對面故人戀戀冀清誨以傾心

回陸全州啟

朽質叨榮已佩五羊之印高情贊善復貽雙鯉之書謙
謙仰君子之風戀戀深故人之意某官機雲家世名杜
材猷燕寢清香寂棠陰之少事蠻溪豪族無薤本之可
除當翺翔金馬之間豈留滯銀菟之久某馳心英矩引

脰崇墉遠矣嗣音顧瓊瑤之何報使之免戾幸藥石之
不忘

回蔡學士賀生日啟

侵尋晚景知牛斗之不神煥爛彫章仰參辰之相比倍
跼深仁之眷益增初度之光恭惟某官瑞企清明氣涵
剛大表表出塵之逸韻英英秀世之芳規隱帙奧篇讀
黃香之未見鴻詞麗藻稱王翰之可珍久肆志于林泉
自怡情于風月夙蘊愛人之德獨存介壽之心俯為初

生欲其難老一言假借或松柏之後彫十襲秘藏顧瓊
瑤之匪報

回湖南韓總管狀

五嶺作藩已銷聲于西道九重錫命遂更治于東偏惟
記室之未通迺書郵之先及某官識探李法名擅于卿
國士無雙有登壇之鼻祖一人當百多戰野之膚公輕
裘夕撫于龍州精甲暫屯于鄂渚顧惟絲薄方媿叨逾
操筆覲然莫報翩翩之問抒辭遠甚空耿耿之思

回知州惠生日詩狀

定三百六旬之歷會遇生朝知四十九年之非侵尋晚
景曲荷松僑之祝光垂李杜之文伏惟某官撫字知名
中和興詠聽訟美甘棠之憩勸農傳岐麥之歌性不違
仁語皆揚善其詩孔碩壽欲俾之熾昌何德以堪榮但
深于藏奔

回趙新州狀

竊審影纓西笑小遲象闕之行理橐東來暫攝魚符之

事先勤榮訊足見高情伏以某官名擅宗英才推國器
九流索隱能讀河間之書千佛聯芳同射平津之策蚤
傳諾仕已歷專城置任棠之孟清哉若水贈袁宏之扇
仁者宜風行將擊柝之間猶限盍簪之阻

回廣西帳幹狀

半年懷舊常望岫以馳心千里寄聲若飛談而對面深
銘永好深激私情某官韻秀朱霞才淹綠水傳幕中之
辨是謂能官流地上之錢共推善計念斯遠別失我良

朋枉兼牘之鱗鱗媿報章之草草

回潮州沈通判狀

伏審拜恩中禁贊治偏城枉雲翰以見詒傳星屏之甫
至某官聯橫許郭方駕曹劉蚤擅價于俊躔久韜光于
仕路居展驥之任寄實重于監州誦訓鯉之文功正煩
于康海念聞名之有素曾會面之未能不腆報章奚酬
雅眷

回鬱林知州狀

睽濶清談屢閱飛葭之變周旋雅好遠承裁楮之臨某
官養氣渾雄存心撫字此時褒詔賜黃霸以兼金他日
歸舟載陸君之一石念披瞻之未再徒結約以彌深

回周貴州謝到任狀

竊審承流鑠水既拜魚書攝事貴州已懷犀印某官風
儀清整器局沉深歌麥兩岐前乎既聞耳矣拔薤一本
今者復盡心焉即有褒綸入登華綴曲枉翩翩之遺第
慚草草之酬

回趙賀州謝任滿狀

竊審解龜古郡鞭鳳亨衢曲垂問訊之勤益佩論交之厚某官材推標的學載本原比及三年已見與求之政統如五鼓不勝挽鄧之情名已列于御屏榮即躋于省闈邈爾承顏之便悵然引脰之私

回范總幹狀

竊審承恩雲闕列屬星臺已協吉于戌瓜遂寄聲于行李某官風儀秀峙器宇淵深有家學之相傳更吏材之

是似足兵重鎮吐計畫于幕中退食私閣奉皇華之膝
下增益過庭之訓軒騰當路之知念昔桂林實望蓮府
睽離既久瞻遡靡忘情非鹿鹿之交禮重鱗鱗之貺

回汪經幹謝舉削狀

征茅引類實採公言摘藻鳴謙難當私謝某官淵源賦
學通敏呈材久贊外臺又屈紅蓮之佐尚淹小選未高
碧落之飛寶雖識于照車言媿輕于推轂曲承榮訊深
戢勤情

回石縣尉狀

竊審青錢中選黃綬榮歸喜動親闈光生里閭某官識
探理窟學富詞源廣陞臚傳共仰鯤鵬之化遐方諾仕
難淹騏驥之馳益載休聲遂階要路未皇贊喜已辱貽緘
回封州教授狀

竊審瓜時涓吉芹泮恢文枉蕙牘以見貽佩高情之良
厚伏惟某官學能日益辭不需同早聯千佛之名已得
羣公之譽當聖主大宗儒術故遠方皆置學官坐絳帳

以談經少煩模範登金門而奉詔即見羽儀懷雅論以
奔馳愧報章之產略

回鄭德慶啟

竊審治聲夙著靡俟造朝吉語載馳復欣典郡方一麾
之宣布宜千里以謳吟某官西都循吏之孫元祐名臣
之世論議共推于魁壘典刑可見于老成未攄經國之
材獨紀牧人之効向來剡竹乃先帝之潛藩今日憩棠
又吾君之舊邸惟兩城之相接在五嶺以稱雄必有異

能遂看褒渥某班荆未幾紆軫已深聲迹相聞斯不踰
于數驛簡書可畏尚有賴于餘波

回陳英州狀

比承謙誨欲得剡章實循三尺之文重屈雙函之禮某
官彰名鴈塔鏹采藍田麥秀兩岐已藹聞于善政河潤
九里更密借于餘波將滿秩以趨朝遂正名于典郡難
虛爵里之辱漫備銓曹之須豈題拂之敢云蓋扶搖之
可俟

回潯州知州狀

遠隄五嶺榮把一麾得之流聞無不稱頌某官包淵深
之度負超卓之材既問政于蓋公欲追蹤于召父沛隨
車之甘雨惠愛無私揚贈扇之仁風芬芳大播行當簡
拔夫豈淹徊念久講于英聲曾未陪于雅論頃傳得郡
將期王事之同偶玷移藩遂有鄰封之隔聊通柔削莫
報珍題

盤洲文集卷五十四

欽定四庫全書

盤洲文集卷五十五

宋 洪适 撰

啟四

賀廣西向運使啟

伏審出綸內闕乘傳外臺騰八使之風聲威行荆渚指
二天之星次光燭桂林朝野僉諧江山改觀某官韜藏
遠業充牣多聞才握隨和擅當今之奇寶聲諧韶濩傳

上古之雅音飽說吏師獨優才具政嘗喧于歌袴名屢
振于埋輪尚遲金馬之游復領木牛之寄用知取予維
出入錢穀幾何志在澄清豈奉行文書而已寧容煖席
即見賜環某夙綴末交浸睽英範偶剖竹有善鄰之賴
更揚糠深前事之慚敷衽論心徒起仰高之恨裁緘寫
抱莫醇問託之勤

回劉肇慶啟

伏審瓜時而往懷印綬以臨州穀旦于差擁車轡而夾

道厥初班錄咸有謳吟伏惟某官學考聖賢望尊者舊
試吏見慈祥之政濟時懷超卓之材出魚契于九重鎮
龍藩之千里昔襦今綉已騰蜀郡之謠右粥左餐可遂
蔡人之樂行將促召夫豈久留某近枉高軒遂承英範
唯鄰是卜幸借潤于靈河無言不醺聊嗣音于芳牘

賀胡提舶交割啟

伏審戴星叱馭涓日視章咸屬耳于前騶獨驤眉于英
矩伏惟某官居今行古肆外宏中裂芟製于塵埃久躋

撫仕分茗溪之風月屢贊名藩遠將五嶺之權盡幹萬
商之貨允謂濟時之彥斯多航海之珍即恐賜環豈容
暖席某自矜顯綽嘗貢柔緘喜聞持節而來時乃把麾
之幸萬事不理待伯始而可知一坐盡傾傳孟公之將
至更期冲嗇式副瞻翹

賀余虔州啟

伏審疏恩中禁作鎮雄藩城郭重來指繡衣之理所兒
童相記騎竹馬于道周初布教條側聆謳頌恭惟某官

圭璋寶器杞梓良材家學相傳無歆向異同之論儒名
夙就少甘竒顯赫之年復掉鞅于魏科浸著鞭于要路
臺網大振獨高屈軼之名郎位有光嘗拜隃麋之賜廼
駐車于章貢草珥筆于筠素已見澄清復將漕輓方遙
鵲而奉計又分虎以收人所至移風不事縫裾之策自
公退食更多戲采之榮既久習于民情宜易臻于治效
即頒綸綍歸侍冕旒某偶玷郡麾獲依鄰燭號五雲體
雖屢枉郇公之書封萬戶侯恨未識荊州之面

賀沈提點啟

伏審榮錫天書寵持星節立九府之圜法久訪能臣專
三官于上林外兼數路郎音既洽時望攸歸恭惟某官
英偉賦才淵宏置度糟粕不膠于紙上宮商皆起于筆
端鞅掌魚符有淮人之孺慕規恢驪駕無漢士之色飢
益懋簡知果膺顯擢廣攬轡登車之寄總冶鎔炊炭之
司權子母之重輕少煩心計接夔龍之步武即聽履聲
某自澗台躔屢移斗柄皇華甚遠旅進退以未能蔭樾

焉依大譴呵而或免

回陸提舉啟

榮拜明恩進膺褒擢一麾出守輟近郡之股肱四牡載
馳寄外臺之耳目郵音甫暨僉誦相歡恭惟某官德粹
珩璜學該竹帛雲間烜赫追入洛之清芬嶺表崎嶇偃
說佗之雄辯自結冤旒之眷見稱簪紱之英久藉藉于
仕途將駸駸于禁路朝廷深知治行連付虎符原隰遠
有光華暫煩龍節即仰北溟之擊豈為南越之留某幸

綴親萼遂依蔭樾方捫襟而自喜將聽履之有期牒訴
喧囂不敏寒溫之問山川跋涉願言衮鼎之調

回鄧漳州啟

拜恩丹扆宣化黃堂方增重于郡符已分輝于鄰燭某
官受材卓偉函器宏深蚤發策于儒科旋濯纓于朝路
連得三刀之夢尚煩雙戟之臨雪白蘭薰獨廉清之名
顯風行草偃即豈弟以政成行遂陟明豈容斂惠某屢
通聲問未際色辭頃接鳳毛斯見義方之訓遠勤鴈足

益知謙德之光

回竇賀州啟

顯差穀旦榮醵棠陰凡千里之提封皆一詞而詠德某
官聯珠傳業片玉呈材力睎青史之賢荐拜朱輪之寵
馬如羊而金如粟清節素傳刀買犢而劍買牛遐萌丕
變即看褒渥入選要班某久濶高標每懷餘論借寶鄰
之潤幸擊析以相聞佩謙德之光媿濡毫之不腆

回徐通判狀

承榮北闕受任南州篤雅眷以相先飾珍勝而見及某
官軼材耀顏盛德照隣蚤馳黃絹之辭久載素絲之節
餞清橫浦謂盡展于鵬圖贊治三城又少煩于驥足即
聞改命豈復遠來念平昔之搔心獨差池于會面偶分
使竹喜傳半刺之賢尚隔成瓜恨失同僚之便

回李惠州狀

竊審撫柔名郡靡辭南嶠之行差擇良辰已協東龜之
吉某官學充素蘊譽藹清芬法任棠水薤之言略黃霸

米鹽之細豐湖足樂顧何羨于谿堂法坐見思遂入翔
于禁瑣少看游刃以俟追鋒某密邇門闌無繇談款亭
瓜相接幸分餘燭之光行李將臨有愧雙金之報

回權梅州狀

比以偏城闕守僉議擇人果得循良往甦凋瘵辱華絨
之見及知善政之有為欲腹供億之須既能身率不競
追科之考更在力行

回南安知軍狀

聲聞擊柝如脣齒之相依情重財緘見肺肝之相示彌
戢能謙之德第增不敏之慚伏惟某官風規閭明德宇
宏達夙著素絲之節遂居畫戟之榮比屋爭傳有去蝗
之異政干城自衛却聚蟻之妖氛即聽褒嘉進班清切
某搖心雖久識面未能方商律之告窮冀黃堂之善葆
回劉通判狀

竊審拜恩象闕諾仕羊城共誇別駕之賢已作著鞭之
計某官材猷奮發襟韞粹醇早欣畫于外臺即颺芬于

華轍歌功康海煩驥足之一來得志摩空看鳳翰之橫
絕雖平時濶半面之雅在難兄契同心之交何幸為邦
遂將聯事遠勤芳訊愧不腆于報章時迓薄寒冀自頤
于旅食

賀田提刑啟

伏審罷拜恩綸榮將使指上方任德務臻禁網之寬官
必擇賢尤重憲臺之選英塵所暨僉論相欣某官奎壁
孕靈溜澠納度蚤策勛于鴈塔即接武于鴈行六察去

邪仁約張敢言之膽四知厲操陽城勞撫字之心爰奉
真祠少休故里忽賴卒哀凶而疊作雖郡僚避難以宵
奔獨追憑軾之風高出投機之計聚鱸鯢于孤壘不使
橫行庇簪笏之名家盡皆寧處旋致靈旗之集弗稽蕭
斧之誅迄能脫離于妖氛信有護持之神物偃先聲于
桂筦遠應二星迎異數于楓宸行躋兩禁某離羣之濶
蹈景已深偶左契之託鄰將漸餘潤幸繡衣之假道即
際清標憑竿牘以攄情冀鼎姻之垂意

謝陳經略啟

垂弧紀旦，慚學易之無聞；削牘鑄辭，辱過情之善祝。雅懷借重，陋質生輝。恭惟某官，聳壑呈材，照隣蘊德。貫魯壁，鄴家之讀；播函京，灞岸之工。八俊乘軺，應景星于高漢；十連植纛，洽惠露于遐萌。少借銀菟，即班玉筍。夙厚合符之好曲，私踰袞之褒。記軫生初禮，踰望外俾爾黃髮。欲三壽之作朋，遺我綠琴。願雙金之何報。

回南恩權州狀

竊審龜筮告猶魚符攝事染華絨而見遺知初政之甚
休某官心術疏通吏材英發盤錯廼彰于利器委蛇見
詠于素絲種韭一畦雅有澤民之志鳴絃千室共推典
郡之能少借剴裁以看潤飾顧分攜之未幾在翹邈以
彌深願寶生經遂躋榮次

回袁教授狀

竊審拜恩帝宇分職教官枉汗竹以甚勤知往瓜之已
及某官學稱經笥譽振儒林絳帳垂堂將應撞鐘之問

褰衣匝序可無鳴鼓之攻即對言綸遂榮朝黻幸從容
之有便冀跋履之自頤

回德慶通判狀

受任題輿涓辰視篆提封千里講德一詞某官量賦沉
深材推敏妙嘗割雞而小試聊展驥而遠來風月平分
已翱翔于半刺雲霄潤步即騰躍于高衢方念語離遂
勤遣訊尚濶從容之便第增翹佇之思

賀林尚書啟

伏審寵拜耀章進都榮次天官其屬六十久虛常伯之
尊武王有臣三千孰出鉅公之右絲綸所布簪紱謂宜
恭惟某官學富盈科量深韜世追風枚賈能緯典以敷
華發采隨何蚤席珍而待聘歷芹宮而假道陟柏寺以
尊朝既接武于夔龍之間遂垂光于虹蜺之上臺綱克
正時高三院之威諫草必焚名重七人之長妙簡已隆
于蠖護祥輝廼燭于文昌望峻官儀上星辰而聽履私
無賓謁指風月以飛談即踐台槐共寧邦本某庀官有

守贊喜無因體號五雲屢枉鳴謙之誨侯封萬戶未降
快觀之心

賀張洪州啟

出綸中禁換節大拜賓客鼎來屢下凝塵之榻山川改
觀一新卷雨之簾聞視篆以敷和輒褰牋而贊喜恭惟
某官梗枏聳壑奎壁垂芒和璞隨珠早席珍而待聘潘
江陸海能授簡以騁妍若時題品之公自奮功名之會
行貳卿之紫橐承密旨于黃樞備殫獻納之忠欲試藩

宣之寄紉如五鼓遂誼吳郡之謠願借一年久斂桂林
之惠幕府既移于閩嶠正堂曾問于蓋公眷益簡于帝
心任復隆于方面令行數月已慰八州之人色比三台
即迎一札之召某自續貂于曩日不對塵者六秋承乏
連疆廼借爪疇之潤指期就道庶披棠舍之陰商節淒
其高牙樂只冀鼎裊之勿爽副簪綬之具瞻

賀呂桂州啟

列職蓬丘摠戎桂筦遠人相語潛消佩犢之風興誦攸

歸共起騃鸞之詠吉諧剛日歡動隣封恭惟某官識妙
倫魁材高肯綮種學遠窮于丘索吐辭皆中于宮商惠
露霑濡最謳吟于名郡華星輝赫聳風采于外臺方清
朝久戢于干戈故重鎮分屯于介冑足食政勞于心計
列城咸肅于指撝遠勤頗牧之謀難屈管蕭之寄遂班
內閣來鎮南垂幕府雄開初笑談而緩帶居忙安作不
愁歎于無襦即迓賜環未容煖席某情深引脰願隔承
顏揚粃居前既自慚于陳迹灌瓜甚美遂有賴于餘波

賀張福州啟

名簡帝心任隆方面高牙大纛最九牧以橫飛緩帶輕
裘挹三山而坐嘯政新視篆喜浹提封恭惟某官嵩岱
稟暉溜澠納度材高盤錯擅多多益辦之稱節貫險夷
玩蹇蹇匪躬之象滄鶩華貫茂著建功足用版曹妙幹
貨泉之柄耘強圭甸稀聞枹鼓之鳴既晝接之益章宜
歲遷而咸允書殿極儒紳之貴齋壇分將鉞之雄襄漢
上流有賴長城之扞豫章大府久喧慈父之謠拜寵自

天摠戎易地惟閩粵東甌之俗本會稽南郊之疆邇今
日之上都廼一時之重鎮民其幸矣公實臨之少煩統
御之良即叶都俞之會某自睽巖電屢閱秋霜竊食海
瀕復借光于鄰燭馳誠門仞敢贊喜于書郵願言裊鼎
之調式副紳綏之望

賀黃提刑啟

渥對綸言榮將使指上方任德務臻禁網之寬官必擇
賢尤重憲臺之選馳聲舊部聳望遐萌恭惟某官學探

九丘文長三變黃鐘大呂參嶰律以含和北斗泰山偃
儒紳而蹈景蚤接夔龍之武遂我獬豸之冠自結深知
式分遠寄乘軺久任周五嶺之東西宜岸屢空踰諸公
于前後人共期于紫橐命復畀以青氍雖平反大慰于
羣情豈獻納可遺于夙德寧容席煖即以節趨某獲保
歲寒款依雲蔭承流千里已逾請代之期借潤二天尚
有承顏之便願言冲嗇庸副瞻翹

賀虔州李大尉啟

竊審寵膺恩綍榮把州麾籍甚威名洋然謳頌恭惟某
官追蹤細柳經武前茅結髮從戎功屢先于勇爵執戈
衛社忠益顯于周盧提銳旅以鷹揚掃孤城之蟻聚智
謀既運氣稔遂空緩帶輕裘少借蕃宣之重高牙大纛
即開慶賞之行某講服有年披瞻無日幸託寶隣之潤
聊通書驛之誠

回董梧州狀

宦海間風恨差池于英矩州符接畛幸假借于餘波方

聆視篆之新已枉揮毫之貺伏惟某官幹時良具耀穎
逸才克全白璧之名久厲素絲之節翔鸞集鳳駕前錄
之美談佩犢帶牛草遐萌之舊染少煩游刃遂迂追鋒
念引領之空勤曾論心之未便第堅鄰好不腆報章

盤洲文集卷五十五

欽定四庫全書

盤洲文集卷五十六

宋 洪适 撰

啟五

賀施察院啟

寵膺制綍進陟憲臺最天下之兩轡卓然獨步近日邊
之一節久矣不聞夙儒既升僉論相快恭惟某官體局
方整襟靈壯堅壁韞珠藏早埋光于川嶽鴻軒鳳舉即

薦瑞于朝廷方正笏于豸冠忽分麾于魚契受釐宣室
已深賈傳之思斂惠富州果下陸君之詔青氈復得白
簡益嚴少煩明目張膽于鵷鷺之間行見聚精會神于
槐楓之上某自睽巖電屢換星霜旅進退以無繇虛寒
溫而敢問

賀陳帥生日啟

候明星于南極聿臨見丙之期賦峻嶽之聲詩允協生
申之什祥開初度頌溢維祺恭惟某官天上謫仙人中

間氣河目乃公侯之相泥塗無甲子之疑江左建旗良
吏于是為盛嶠南揭節膚使其猶劣諸遂居方伯之尊
式賴長城之扞宣室思果于賈傅吳人難挽于鄧侯在
厥初生必得其壽彼松柏四時之貫所謂經寒而知惟
龜鶴千歲之殊斯可同日而語某情深賀履禮隔登門
有酒如澠敢介遐年之祉若金作礪即看晉晝之榮

賀呂總領啟

榮拜制綸寵將使指聯華省戶依烏膽列宿之文足食

屯營流馬幹百城之運郵音所暨與誦謂宜恭惟某官
超卓賦材沈深置度殖學得傳家之妙飛談馳驚座之
名既剖竹于雄藩遂埋輪于劇部以經潤飾通儒稱者
三人有志澄清天下號曰八俊益隆瓌望密簡眷知凡
財用之在版圖式付民曹之寄給饋餉不絕糧道重分
軍政之權即迂節趨豈容席煖某仰高有素快覩未降
借蔭卿雲方備員于嶺表貢誠子墨敢贊喜于門闌

賀黃提刑交割啟

兼程叱馭涓吉佩章善類得所依歸遠人無不忻頌某
官咀華竹素擢幹梗枘魁然見長者之風溫其有君子
之德蚤聳烏臺之望洊煩龍節之行五嶺澄清初祥刑
于東表九重簡注迺易地于西偏斯拜渥恩復臨舊部
夸鄉上冢散金能洽于故人輿轎入疆持斧載瞻于膚
使即聞嚴召歸還近班某自讀制綸即飛慶牘庀官席
蔭喜既僭于眉端指日接辭情庶披于心曲

賀廣帥陳侍郎啟

伏審名簡帝心任密方面輕裘合北久傳峴首之碑輿
轎宅南來酌貪泉之井先聲所偃公望迺歸恭惟某官
參軌前良垂模後進廣庭高步仰三傑之賜芬要路橫
翔凌九臯而徹響誨方袍于槐市讎斷簡于蓬丘列星
已應于天文四牡暫煩于風力惟臯呂體觚圜之意故
閩淞有固空之隆秉筆赤墀記注為千古之法絕綿外
野禮儀成十月之朝繇甘泉近侍之班作襄漢上流之
鎮自休閒館未塞興言方謀帥臨黃木之灣乃鉅公開

紅蓮之府羊仙薦祉必須執轂而來龍戶集衙當有鵷
裳之聽上召則邇人留實難某夙際光儀猥勤題拂鳴
珂相踵深慚糠粃之揚膠柱不調所幸瑾瑜之匿偶濫
移于左契度難俟于高牙憑桑尺以搖情句和襟之納
祐

賀廣漕鄭郎中啟

伏審光奉帝俞肅將使指車茵所問來休黃木之灣印
笥重開自是青氈之物積十年之遺愛踴列郡之先聲

恭惟某官德湛量陂名馳藝圃雅雅黃鐘之在簾英英
白璧之輝山八俊拔竒特表絃歌之績九重錫對遂榮
銅竹之行入贊大農進符列宿賦皇華而諭領振漕事
以裕民自奉計而歷他官忽拜恩而臨舊部雖木牛流
馬之陳迹較然可尋豈雲龍神虎之通閨闕而不召人
勿私喜公寧久留某夙景高纏未親餘論自聆詔綍謂
依賴之可期偶易州麾復差池而相失尚借光于仁里
仍接畛于治臺竊圖行李之間或有班荆之便

移福州謝趙提刑啟

輯粵空餐既大何之幸免掌閫出命顧繇力之弗勝惕
拜絲言喜投樾蔭伏念某賦尋常之質闕尺寸之長隄
五嶺者八年易九垓之三組心雖黽勉初無畫餅之虛
名志欲激昂終愧貪泉之高躅恐黜幽而負殿方請代
以圖歸豈料清朝沅移要屏大懼鉛刀之鈍難求布鼓
之聲行闕中天望日華而已近故鄉接畛知風景之不
殊自非麈尾品題之私安得羊角搏扶之便此蓋某官

直方厲操淳白鳴徽有更生博極之書得東平為善之
樂望宓派玉節峻輔金屢司發軔之權復佩平反之寄
用恩及下為長者而折枝見惡在前如農夫之去草時
謂外臺之表人歡夏屋之依每曲偕于揄揚致疊叨于
推擇某自尊山斗浸換星霜聽言未愜于鄙悰投分已
同于夙契遂殫五技敢忘前事之師少偕六條庶逭後
期之責

謝鄧建州啟

輯粵空餐偶大何之獲免掌閫出命顧縣力之弗勝惕
拜詔綸幸分鄰燭伏惟某官宅心端栗接物惠和才備
四科挹前良而參軌風舒六藝發妙語于抽毫嘗鉤校
乎三尺之文廼翱翔乎半刺之任鑄龍班節原隰遠有
光華分虎作符朝廷深知治行籍籍綉襦之詠駸駸筆
橐之除惟平時曲借于袞褒致懦品疊更于器使某自
親風度已託歲寒樾蔭焉依嘗略六條之問棠陰密邇
復漸九里之餘

回知州賀生日狀

伏承軫記生初騁妍意表月宿南斗無片善以著稱體
號西崑有英辭之轍古高情甚渥朽質增慚伏惟某官
論議粹醇襟靈超詣材推時彥暫分阜蓋之權清畏人
知共說素絲之節夙締芝蘭之好欲先蒲柳之衰貽之
嘉音介以難老一字之踰華袞拭目難任雙金之報綠
琴覲顏何已

謝知州惠生日詩狀

誦蓼莪之篇老將至而增感介黃髮之壽禮甚厚以難
任深戢謙撝架增悚汗此盖某官德惟貴齒仁以根心
决雀躍之訟于棠陰案無留牘搗錦續之章于毫穎才
有殘膏斯因初度之辰曲借長年之頌確然殊倦下鱗
使于長川賁以好辭追馬人之前藻剖珠私喜報玖知
慚

回連大庾狀

講聞風問積有歲時獨覲面之差池每馳情而悵結某

官學充素蘊世述清埃遠彈弁于梅山久鳴弦于花縣
服勞五斗已書集鳳之能振響九臯即拜蓬駕之寵曲
承華訊徒激鄙悰顧藏篋之翩翩慚濡毫之草草

回州學正錄狀

竊審較評粉社立矩矱宮人皆曰然公豈自歎解元沉
潛蠹簡埋鏹螢牕未逢流水之知尚屈青雲之便朋友
共惟于講習深戒繡擊老成端有于典刑遂儀逢掖某
曲迂玉趾見賁瓌詞第銘四益之謙有覲七襄之報

回何直閣狀

分麾百粵已越戍期徙部七閩誤膺詔札揆謏材而惕
若倚餘潤以欣然某官氷壑照人驪淵瑞世談必傾于
一座書能讀于五車下筆掀雷淡墨題乎鼎級吹藜奪
月雌黃匪乎蠹篇猗歟雋聲籍甚榮路已青冥之垂上
却朱紱以退飛既聯職于道家蓬萊迺俛眉為諸侯賓
客鬱沈亦久蘊蓄未攄惟曲偕于齒牙致屢叨于方面
合盍簪于曩日數判袂以積年何幸衰蹤復尋舊好驅

車倍道庶瞻西祀之登掃榻聽言敢後正堂之避

回叅議賀郎中狀

分麾百粵已越戍期徙部七閩誤膺詔札揆繁劇而縈
抱倚飲助以信眉某官學綜九丘詞傾三峽丹青騁步
開天祿之陳編列宿垂芒賜喻縻之佳墨遂抽簪而飛
遯旋側席以旁招方退然油幕之游迺昔者繡衣之治
增重外閫實煩遠謀顧是微蹤遂將竊食介季父同年
之好頃接英躔記池陽一夕之談屢更緹律復有親仁

之便可知逃責之方

代饒州守迎交代蘇尚書啟

伏審出綸法坐剖竹名邦千里心馳共仰甘泉之老一
襦顏汗冀新蜀郡之謠公望所歸先聲是偃恭惟某官
稟靈江漢發彩隨和讀八索之遺書備四時之和氣挺
挺有祖風烈濟美儒先堂堂為國光輝蜚英庭綴自粉
闈之彰組入芸閣以提綱成春朝絕野之儀批夕拜瑣
門之敕國有六職峻紫橐之貳卿汝作秩宗續青璫之

舊物夢刀屢矣買犢紛然難休老氏之祠來治番君之
國論德而論四子昔已作詩敘惠以施一州今當有詔
恐居中道遂儀上京某夙企清蹕未親嘉誨鳴珂相踵
自慚糠粃之揚膠柱不調或幸瑾瑜之匿飛霜急節高
蓋出關冀裊鼎之嗇宦副簪綬之瞻矚

賀知饒州李左司啟

易地出綸顯拜魚符之寵過家夸組甫嚴熊軾之程輿
誦適歸先聲是偃恭惟某官星躔隕祉月脇鑄辭卓爾

昂霄壁千仞而獨立淵乎韜世陂萬頃以有容自高鵠
鷺之行不藉蚍蜉之援臺官張膽久震懾于朝端宰士
盡心竭彌綸于省闈惟今剖竹所治蓋昔灌瓜之隣斯
民熟五袴之謠指日俟雙旌之至恐不席煖遂將節趨
某頃綴蓬瀛嘗披雲霧維桑有禮知厦屋之焉依置薤
可言冀賓階之與進

代程湖州謝執政啟

外史養病方賦歸之三月輔藩代置復流煥于九天班

祿云初哀遲自懼伏念某學不足以要終原本才不足
以治劇刺繁鳴玉要津點北門之清近懷金拱著惡西
府之贊襄久休香火之庭自適山林之性制綸橫及留
鑰遣行力以疾辭曲蒙恩貸尋邯鄲之故步偶未失之
求勾漏之祕篇他非望者豈期推轂仍使建旗惟茲若
雪之區今作股肱之郡起家甚寵卧治則難茲蓋伏遇
某官德簡細旃望推隆棟方地闢天開之旦籍甚更張
念塗歌里詠之民邁其共理當都俞之間暇廼假借于

拙疎雖鞭策其不能恐譴呵之弗免終期美蔭不累化
鈞

代賀万俟相啟

渙號路朝升榮揆席家至戶曉幸聖政之一新日晏天
清見真賢之復用流傳所暨鼓舞率同恭惟某官道縕
經綸學該貫變挺松柏後凋之操抱著龜先見之明徧
陟禁塗進叅國秉間兩社而為輔備竭贊襄有一言以
興邦益崇倚注忽遭讒口遠落蠻溪孔子居中不勝靡

裘之誦周公在外競歌魚戩之詩大君躬攬于萬幾溫
詔首馳于一節對揚便殿深契淵衷夢卜協求果作巨
川之楫棟梁有託大開衆正之門方懲沸而吹鑿必解
弦而調瑟宗祊迺慶華裔具依某頃綴事樞密叨蔭櫟
念階符之久隔際泰道之光亨代匱輔藩已竊貢公之
喜馳神材館莫瞻漢相之尊

代賀湯樞密啟

疏榮綸綍冠位樞機朝登真賢人有嘉頌恭惟某官鳳

翔千仞樂奏九韶健筆振奇飄飄有凌雲之氣清埃擢
穎赫赫乎逐日以新自首中于魏科即立登于榮路身
為國史嘗書笏以珥彤命作秩宗遂荷橐而持紫入明
光而起草對宣室之問神浸積簡知進居宥密淵謀入
告非堯舜之道不陳遠業所期豈管晏之功可許方朝
政判東西之府而宰臣充左右之官惟是元樞久虛高
位式應魁三之象聿求第一之流帷幄既尊何獨遐衝
之折搢紳相語益觀上治之興某舊矣仰高闕然快觀

承流輔郡已叨推輓之私貢牘崇階政竊憚蒙之託

代張建康賀程參政啟

顯揚書贊參秉化鈞惟舊德之立朝有頌聲之載路恭
惟某官學該治忽識判幾微元圭彰間出之珍喬柏聳
後凋之操凌雲霄而徹響踐台斗以結知文采陸離得
大誥三盤之體樞機周密如神爵五鳳之時不競急流
來休綠野方萬幾之躬攬宜一節之首馳畀陪都管籥
之司易輔郡股肱之寄上既久不見賈欲納嘉謨使無

何果召叅遂司大政螺洲有識鵠閣可期某猥備藩宣
獲依坱圠馳神西序旅進退以無繇投分東阡大譴呵
之或免

代謝魏越州啟


種東陵之瓜久甘退屏掌北門之管忽拜誤恩懇避莫
能疾顛是懼伏念某性則寡與學無他長綴侍橐于薦
紳毫毛何補奉真祠之香火齒髮浸衰政斂迹以養痾
豈牧人之興念遂叨晉秩架積震驚虎踞龍蟠茲作京

于岳狩雞鳴狗吠仍接壤于鄉關僥幸如斯吹噓有自
此蓋伏遇某官道包貫變識洞眇繇登要路以著鞭追
前英而叅軌方琴瑟更張之際有契符相合之知維石
具瞻政切公槐之望急流勇退忽傳使竹之分當一都
一俞之初借三熏三沐之助致茲推擇及此拙疎深慮居
餅之危有辜推轂之意訟棠攸阻旅進退以無因蔭樾
馬依大譴呵之或免

代賀湯中丞啟

命播芝函位尊柏寺郵封四達歡誦一詞恭惟某官超
卓賦材剛方厲操自得青雲之路即膺丹扆之知方解
絃躬攬于萬幾故出綍首馳于一節久不見賈非復鬼
神之談無以易堯即居御史之府鷹隼厲橫秋之勢豺
狼空當路之羣凡此茹連有同草薶積三十章之奏牘
振二十載之臺綱威動垂紳寵躋專席近世斯焉獨步
益峻風霜泰階所謂六符共期霖雨某庇身魚鑰引脰
龍門敢修染襞之儀少贊典籤之喜蕭辰始肅禁密多

休惟寶護于夙興用迎承于晝接



盤洲文集卷五十六

欽定四庫全書

集部

盤洲文集卷

五十七至
六十三

詳校官庶吉士_臣初喬齡

主事_臣呂雲棟覆勘

總校官編修_臣王燕緒

校對官中書_臣李斯咏

謄錄監生_臣杜三泰

欽定四庫全書

盤洲文集卷五十七

宋 洪适 撰

啟六

上宰相啟

三千年而河清久矣人生之難竢七八月之苗槁幸哉
天澤之可期敢輸懇懇之私庶動巖巖之聽伏念某所
稟極陋其愚不移學雖苦於丘墳譽不揚於鄰曲操數

寸之管偕鴈序以齊飛受半通之銅點麟臺而羣處陟
岵幸迎於禿節入朝遽觸於危機不勝私情遂求外服
抗塵走俗已日往而去官洗垢索瘢致風聞之及嗣抵
於深憲儕彼壙僚玷缺隤聲雖生以何面目困窮纏已
脫死僅如毛釐再會赦而始復舊階一終星而未刊黜
典迫於立壁無以杜門登東臯而臨清流自憐骭髒下
喬木而入幽谷誰不擲掄未涓行李之良忽負茹荼之
痛偶逃溝壑得累鑪錘恭惟相公軌躅孔顏錙銖燕許

當聖主解弦而更化以真儒調鼎而贊元道大域中轉
洪鈞之一氣計安天下猶泰山而四維東閣廣翹材之
方西曹無滿謫之問某運將傾否筮亦遇干鷄失旦而
一鳴靡忘振翼鵲繞枝而三匝所願安巢倘回肉骨之
恩可但漆身之報

賀新饒州唐舍人啟

名簡前旒任隆左契聞使君到大喧來暮之謠與老人
期共快爭先之覩欲伸賀履敢問典籤恭惟某官聲叶

舜儀寶參郢握淵雲驚代挺玉壘之靈暉駟瑗名家禪
金羸之祕縕一時絃改多士節超結當宁之深知拜司
光之異擢廣內雅雅世南則行祕書柱下昂昂董狐乃
古良史正刷橫翔之羽忽迴勇退之舟不謂吾邦迺煩
鉅德凝清香而森畫戟安能久居此乎闕紫闥而攀台
階斯拱而竢之耳某未披雲霧常歎參辰麥千畝荻千
章遂托居山之庇水一盂薤一本願容置屏之談

荆門謝宰相啟

觀六符於穹漢心切呼天乘一障於重湖身難擇地仰
銜厚施敢寓微衷伏念某生以數奇缺然寡智頃疾顛
於僻郡即却掃於荒閭賤子具陳誰恤弓傷之阨室人
交謫畧無裝橐之儲謀半菽以偷生泣編麻而瀕死豐
澤未逢於時雨高躔已匝於歲星公道初開杖拭非辜
之士私憂遽集迪遭不孝之帑偶轉壑之賒期遇濟川
之在上抽毫進牘妄干亨否之榮揆手覆羹危掇瀆尊
之罪傷哉貧也止或尼之敢期播物之私亦預承流之

數震雷霆而破蟄奮此幽蟠注渤澥以濯痕略其宿負
大恩特達小器滿盈茲蓋伏遇相公任重推溝材收躍
冶欲八荒莫不擊壤無一介而使抱闕吐握既躬其勞
爬羅有味其語前鴻後鴈或假借於雲霄枯木朽株必
薰蒸於芝菌特捐小壘漸進畸人某敢不履影懲愆刻
肌報德挾泰山以超北海揆路非難呼中道而激西江
恩波可冀

與交代趙知軍啟

與郡守為符忽焉分左躡君子之躡有以指南聊先汗
竹之私用結斷金之契恭惟某官琮璜等潤咸護參和
呈翔仞之靈輝抱昂霄之美幹多文為富足更生博極
之書大雅不羣得東平最樂之善懷佯膺仕烜赫華名
清標共仰於素絲錯節始彰於利器方英主攬權綱之
柄欲諸姬壯磐石之宗凡朱軒皂蓋之除多玉葉金枝
之雋一麾敷惠最楚甸之列城五綉作歌挹西京之循
吏聞今日耕桑之野皆向時荆棘之場有凝寢之清香

無穿墉之健訟已成樂土為利後人諸公興推轂之心
闔郡阻留鞭之計即前帝席遂陟從班某風景高標未
親餘論水擊三千里而上將幸瞻前及遊十九年而新
願言告舊傾翹之切敷染亡窮

為大兒江東漕屬上使者啟

家徒四壁甫從宦海之遊我有二天遂席卿雲之蔭方
憂尸素敢後殺青伏念某馬走品微鼠肝姿薄學六甲
五方之事佩鞬無聞讀九丘八索之書為裘滯墜蚤因

延賞獲免請農正鼓箴以求師敢彈冠而入仕覺生私
室禍及大門遺忠見軫於朝廷異數俾襄其寔宥猥令
就祿非曰量能退惟一物之不知安得三年而善後乘
財用之出入尺寸無長計班資之崇庠斗筲奚冀仰祈
覆露尚切超超恭惟某官學貫籤牒識倫著蔡自占月
中之桂久騰日下之芬方聖君躬攬於萬幾故鉅德首
迎於一節奉常絕禮進前席之嘉猷劇郡埋輪賴外臺
之華使擢象已躋於中祕疏屏深結於上知鏗錫八俊

之聲震懼六條之察即歸法從難借餘光某將侍履約
獲承鞭策小兒未知為吏盡託恩波若曹無益於官難
逃譴域

荊門到任謝宰相啟

貧切膏肓歎編蓬之左計恩深塊土點剖竹之下陳逾
月汎舟蠲辰視印伏念某千慮無得一班弗窺少年妄
意於臨民或能豈弟半世銜冤而奪祿不復激印敢畫
指以書空祇甘心於殍野帝攬權而真宰相士失職者

泰道來補劓息黥育豐肌於朽骨捷鱗掉尾轉窮轍之
清波畧其三尺之拘畀以一麾之末惟當陽君之故國
在雲夢澤之西偏二百里男三百里侯本密連於近甸
六十曰耆五十曰艾皆熟記於舊聞雖創痍未復於承
平然風俗弗移於醇厚賦輿既簡獄訟不生儻鳴鷄吠
狗無貪吏之須則去馬來牛有樂郊之漸退惟么曆恐
負使令茲益伏遇某官挈國大儒夢崑良弼叶璿璣玉
衡之効光金匱石室之傳以堯舜愧恥其心斯焉致主

彼臯夔密勿之輔可以齊名方校短以量長俾承流而
宣化興憐困躋初試凋殘豈止捐奉稍以活其妻孥亦
將觀政事以品其人物某敢不自鞭蹇步庶効秋毫敢
作偽聲以八萬流民而受賞尚期他日有五六老叟之
送行不致瘵官是為報德

謝吏部賀尚書啟

十六年之去國久蟄蝸廬三千里而遡江始開蛇笥深
憂尸素敢後殺青伏念某生也多艱少而自苦搢數寸

之管偕同產以聯榮受半通之銅羣大雅而雙入陟岵
甫迎於禿節立朝遽觸於危機既補外以終更又投荒
之及難誰造哆箕之錦遂逢偃月之刀冤聲不徹於九
閭官簿退飛於一紀幸改絃之盛旦得夸組於小邦有
社有民惟當陽君之故也迺疆迺理自雲夢澤而左之
儻鳴鷄吠狗無貪吏之須則去馬來牛有樂郊之漸自
惟么膺忍負使令茲蓋伏遇某官韜軼英躔鏗鉤禁瑣
就日妙侍言之選迴天高批敕之聲懷文以裁帝墳書

成金匱分職而掌邦治班俊玉除緼推轂之仁心憐傷
弓之弱羽曲垂題拂致此叨逾某敢不思効秋毫自鞭
蹇步台符在望旅進退以未能雲蔭無私大譴呵之或
免

上荆南劉兩府啟

十六年之去國久隔鵷行三千里而溯江遠叨魚契焉
依夏屋敢後書郵伏念某生也多艱少而自苦頃中含
沙之射遂傷偃月之刀寃聲不徹於九閭官簿退飛於

一紀幸改絃之盛旦得夸組於小邦窮猿投林見微柯
而亦喜枯魚涸轍得涓滴以更生茲蓋伏遇某官勲鞏
邦基望崇人傑探金匱六弦之秘分狼弧參伐之威貫
日月以輸忠挫虎狼而奪氣綉襦安堵洽惠露於羣黎
樽俎折衝作長城於重鎮某自憐骭骸獲托幘幪異世
荊州復有依劉之幸列侯萬戶何比識韓之榮

謝王總領啟

船引蓬萊誰恤囚山之久符分銅竹自嗟垂障之微尸

素云何殺青敢後伏念某千慮無得一斑莫窺自射影
於含沙祇甘心於殍野會清明之上治點宣布之下陳
有社有民蓋當陽君之故也迺疆迺理自雲夢澤而左
之雖創痍未復於承平然風俗弗移於醇厚退惟么膺
恐負使令茲蓋伏遇某官奧學盈科清規出類芒寒列
宿言禮樂遠有光華檄到百城問錢穀幾何出入外足
連營之食上寬法坐之憂即以節趨難乎席煥顧小吏
漫加於鞭策恐外臺不歎於幘幪某敢不瞻仰光儀奉

行約束楚雖三戶尚求瘼之未能我有二天茲包荒之
可恃

謝宰相改正過名啟

十日寒之拙宦可題於良史一星終矣明刑獲改於秋
官佩造化之更生顧么微而何報伏念某昨從外補已
得代還偶親庭嬰禍於鑠金故郡將棄機而下石指為
奇貨肆厥巧言釀白簡以報私環赤城而滌垢法家舞
智卻回牘背之書獄吏趨時別上需頭之奏議辟遂淪

於胥靡免官自嘆於禿翁跼跼墮水之鳶奮飛無計累
累喪家之狗濱死誰憐已甘漂溺於風波何意清明之
天日望大鈞而辯數致密網之平反方商鞅作棄灰之
刑難乎免者如曾參有投杼之事久則昭然茲蓋伏遇
某官德類離倫仁心濟物佐域中之有大納天下於無
冤若伊尹之思匹夫恐失推溝之澤謂蘇君當宥十世
特施及嗣之恩出嚴棘之赭衣脫枯桐於黔突某敢不
魂驚曲木跡鑒覆車復鴈門之跡益矜細行問翳桑之

病長記窮途

賀王成都啟

夢益三刀權尊九牧結裝去國不辭蜀道之難傳命塞
途已覺雪山之重貢誠小牘贊喜高牙恭惟某官象劑
諧聲鄧林擢幹望傾後學仰北斗之垂芒名滿廣庭接
魁星而齊色會光亨于泰道能寤合于淵衷紬金匱石
室之書四提直筆鳴紅藥蒼苔之佩久演明綸追還渾
噩之風密吐忠嘉之論遠坤維之謀帥輟鼎貴以籌邊

吾徒得君卧治之為淮陽而用黯有欲為王留行者願
孟子之在齊蓋摠戎于歲月之間即穆綽于廟堂之上
某退惟櫟櫟浪託粉榆流澤九京既踰袞得見袞之字
冒恩一障繇推轂而有味其言顧謝悃之未緘已除音
之先播卓然方伯財取道于隣疆縛以微官阻望塵于
謁舍甫新歲律正釀春寒冀垂意于持生副凝旒之慮
遠

答張縣尉狀

鼓琴有山水意未易知音擲地作金石聲自應擊節某
官沈酣七畧鑽厲三餘異曲同工已有飄飄之氣博聞
強識必成灼灼之名徒煩問稼于老農盍請誨規于大
匠欣然嘗鼎媿彼報瓊

回教授啟

訪當陽君之故既玷左符定管城子之交迺聞高誼驤
眉則遠數祗可期某官學海窮源文河涌思青氈對客
泰然一坐之寒絳帳稱師發彼三隅之誨以茲廣譽必

上清班顧以薄材遂攀逸駕庶幾良藥之誨可追素餐之譏

謝張建康舉十五年前陞陟啟

治病七年那得三齡之艾成功一簣克全九仞之山媿
鄒子之夜光點汝南之月旦伏念某聲銷鄰曲識閭丘
墳頃佐郡以終更值含沙之肆毒獄皆文致既刻跡于
周行命與仇謀即灰心于禁進顧銓曹之不齒束伐閱
以相忘久矣棲巖期于夢野會更張于治具有復起之

痿人焚厥丹書假之皂蓋尋鉞刀而再割積琬厯以一
終計班資之崇庠未離墨綬為題目而甄拔烏有舊章
蒙泰階仰而思之幸異時僅有存者遂飛一鶚之表用
迴六鵷之程茲蓋伏遇某官天上景星人中霖雨帝以
名公而分陝世期汲黯之在朝十國為連偕虎踞龍盤
之重八元斯九積蜩蛸蠖獲之思以留鑰而折衝蓋儒
寇之司命興憐社櫟獲託鄉枌推轂有味其言猥叅寶
積納溝不被之澤倚竢洪鈞某名玷闕負時增倍價取

人失之子羽益務省躬草奏不如陳湯敢羞知已

謝魏潭州啟

居狄山之一障代匱隄冬陳方朔之六符依光垂象禮
存事大罪恐瀆尊伏念某馬走品卑鷄尸用小引舡而
去渤海寢遠蓬仙登陸則有天台亦終瓜成熟料含沙
之毒巧符偃月之謀銜冤莫叩于九閭奪爵遂綿于一
紀循陔荒服幾不免于惡氛負土故山抱亡厓之沈痛
會蠲除于密網得撫字于疲氓考前召後杜于往圖未

能敷惠眇曲沮清漳之遺趾何以銷憂欲遣信郵實資
庇蔭恭惟某官材推隆棟名簡細旃初躬攬于萬幾即
首馳于一節談曰猶望高子賴以興邦道益自比孟軻
去其塞路烜赫解紃之治超踰補袞之詩溜蠹靡留紀
綱丕變我心匪石必公道之大行衆口鑠金以价藩而
靜鎮薰重湖之叶氣鬱四海之甘霖某辭叨抽毫神馳
茸纛仰帡幪于夏屋竊動歡顏期塊北之大鈞倘收棄
物

與交代梁判院啟

聞買臣之引綬有客傳呼先越石而著鞭與公汎掃重
慙歟批敢廢裁絨恭惟某官結綠輝山長離覽仞家傳
赤舄鄙簪笏于懷繡志凌青雲圖翰墨之勲績破古書
之萬卷諧雅奏于九磬繫聳壑之超羣即監州而騰譽
上念四蛇之輔嘗問世卿人稱雌霓之詞可司帝制曷
為頽首亦欲乘邊挾清漳而倚曲沮獨有仲宣之賦祕
明璣而潛美玉來續贊皇之詩某惠不蘇枯罪難逃責

切喜契符之合迺逢筆硯之交必懷瑾以匿瑕不索瘢
而洗垢情同兄弟非彼一時之面朋好永子孫以吾兩
人為鼻祖

回富提刑啟

天陞出綸坤維揭節方君行仁政務臻禁罔之寬欲下
無冤民尤遴臺諫之選郵音所播僉誦曰然恭惟某官
降祉雲達騁詞月脇惟慶厯之變高有列傳言視西漢
之韋平不同日道宜有家傳之學益增世濟之光自涉

要津共騰廣譽天下號曰八俊比迹東都刺史間以六
條飛聲南服果聞簡注進掌平反諒無席暖之淹即有
圖空之効遂迎名渥歸立從班某夙仰高標未親餘論
曲城僻壤幸逢四牡之馳除館清泉遂借二星之重

盤洲文集卷五十七

欽定四庫全書

盤洲文集卷五十八

宋 洪适 撰

啟七

迎施運使啟

傳建節乘輅之命竊喜忼懽講抽毫進牘之儀不虞蹉跌恃兼容之雅量寬再瀆之嚴誅恭惟某官學蘊淵深材猷超卓喬枚聳壑必應明堂之須英采輝山見稱東

序之私自登文石益振芳埃著嶺表之澄清寄湖陰之
飛輓二星所次仰高漢而熒然六轡載馳環列城而惕
若仄聞騶哄密邇疆封某鼠技雖窮虎符無補解印綬
而輕去未敢望風負弩矢以先驅由茲指日

答凌鼎州啟

伏審解組極邊擁麾名郡未還筆索之舊列尚鬱縉紳
之公言恭惟某官量賦登閣識該貫變大對比魁星之
色高談開霖雨之期禁路光前思涌泉而錯枉長城杆

遠名立峴以蜚英方清朝渴竚于儀刑豈窮塞久勞于
籌畫少移印篆以便節趨漁洞桃花寧作成蹊之計沙
堤槐影想聞呵道之聲某蹈景歷年託隣旬月千里糧
不費行也有慙事鄭之儀萬戶侯豈足道哉竊幸識韓
之喜

回郢州侯教授啟

農疇聯屬殆鷄狗之音相聞宦路差池乃馬牛之風不
及敢期四益先枉一行伏惟某官雅叶舜韶寶叅和璧

九變復貫執古道之權衡五色成文絢雕章之黼黻士
久尊于講席人常滿于坐氊洋然庠聲藉甚朝望過郢
中而歌雪難措客詞居稷下以談天共傳師說即汗青
于石室遂持紫于金門某質稟庸常心慙撫字斗升涉
遠正思鄉動遊子之情只尺仰高如逃谷有足音之喜

回胡知縣啟

讀太史之傳仰伯始天下之宗官君子之鄉講士龍雲
間之譽何期四並先枉一行恭惟某官覽仞呈祥顙門

種學喬拔挺特材可偁于明堂拱壁陸離寶盍陳于東
序重以鵠原之望共期鵬海之程卓爾高標恬于榮進
芙蓉汎水久挂頰于名山桃李成蹊將俛眉于壯縣少
試弦歌之績即叅紳佩之班某自顧凡姿漫無善狀為
孟玉而設榻迺幸肯臨曉漢陽而置孟願安承教

回王潛江啟

鳴鷄吠狗幸四境之相聞足鯉多鴻枉一行而見寄深
佩謙謙之好有慙草草之酌某官輝穎時流叢芳世烈

允蹈淵源之學交稱盤錯之材千室鳴絃有長謠之咏
德餘糧棲畝繇善政以產祥爛其桃李之華屈此梗枿
之幹竚聆公舉入綴清班某猥玷郡章獲分隣燭明珠
絢彩知碕岸之不枯良藥發言庶沈疴之可去

與周郢州啟

鳴鷄吠狗夙通里巷之歡食瓜條桑重結鄰疆之好可
無一紙往白雙旌恭惟某官包括多聞充盈雅量比美
玉精金之稱寶遇盤根錯節而知材繇綸寵以專城有

襦歌之塞路凝清香而談笑最治行于等夷賜洛濱之
詩正開元之重外奉會稽之計宜嚴子之留中某顧以
凡姿飄然遠宦河潤九里蔭方賴于餘波醫折三肱言
佇期于良藥其為詹邇未易布宣

徽州到任謝宰相啟

起徒中而護塞甫閱三時涉畿內以典城旁隣四壁仰
德輝而咫尺超恩紀于尋常伏念某造命多奇憂貧甚
久為十年之計者儋石無儲取一障而乘之大鈞未報

遠蒞凋殘之俗畧無勞來之功正懼詣曹迺易地既
斥堠免望烽之卧敢過鄉效垂組之夸矧是富州咸謂
溪山之勝茲同輔郡密依日月之光在古今選用之不
輕獨朝夕憂虞其弗稱茲蓋伏遇某官道高夢野望峻
經邦右商實惟阿衡帝心平倚使趙重於大呂國勢尊
安以時棟而掄材蓋儒冠之司命取上駟不遺于下駟
由遠郊遂寘于近郊凡此生成若何糜殞某敢不力圖
撫字用答使令問羊然後及牛敢專任數搏蟲不可破

雖戒在容姦

賀湯左相啟

伏審庭渙明綰朝登隆棟轉洪鈞之一氣久矣贊元陳
泰階之六符誰其出右巖廊有慶華裔具瞻恭惟某官
智過萬人德尊一代金口木舌集聖賢之大成淵角山
庭應乾坤之上瑞充積覺民之道踐行稽古之言以著
龜先見之明致琴瑟更張之治成湯之于伊尹所謂千
載相逢孔子傳之孟軻共仰大儒之效屬有甲兵之問

不無疆場之疑邊瑣周知第沈烽于幽障廟謨素定迄
奠枕于上京副袞衣虛左之求賴鼎鉉光前之傑注意
采重額面益尊某身在方州心馳潭府望塵擁笏莫瞻
望于喬槐贊喜抽毫聊整齊于尺楮

謝王樞密啟

起家荒戍旁隣左袵之道易地輔州復接東阡之畛溢
寸襟而懷德具片札以貢誠伏念某技則五窮慮無一
得自禍萌于偃月已望絕于干霄落南山之箕久營半

菽泱西江之水孰顧常鱗忽叨乘障之除未著利賍之
最飢者易食謂拙政之可稱實不副名偶外臺之並奏
何期誤渥驟昇邇封夸三組以過鄉敢循覆轍歌一襦
之安堵請事舊聞茲益伏遇某官任重經邦道高弼后
楓宸納說非堯舜而不陳松漠結成雖蘇張而猶劣夙
垂推輓致玷選掄某敢不願補毫分恪遵甲令台星兩
兩仰光燄以非遙夏屋渠渠喜幷幪之有託

回通判啟

伏審拜恩中禁贊治名城枉月楮以見詒知星屏之且
至恭惟某官材猷挺特學蘊淵深英采輝山見稱東序
之秘喬枚聳壑宜應明堂之須臾久作于一行任尚居
于半刺同流王化政須康海之功高蹈天衢難屈凌雲
之氣某久聆雅譽未際英標將結好于金蘭庶免愆于
銅竹

回孔主簿啟

登仲宣之樓正遠懷于吾土曳任君之杖乃易守于鄰

邦非藉揄揚那能僥倖伏惟某官稟暉闕里馳譽儒林
杞梓千章可謂昂霄之幹鳳鸞六翮共稱覽仞之祥即
上要津遂據素蘊某頃雖一面忽已數年沃若惠音顧
瓊瑤之何報使之免戾幸藥石之不忘

與江州汪直閣啟

易地分符遙指高陽之里問津弭楫將披樂廣之天敢
修好于柔緘以聞名于畫戟恭惟某官覽輝千仞擅價
連城蘊弼中彪外之姿挺博古達今之識縹囊盈卷摘

黼黻之韙辭白水飛榮列龍蛇之英輔自登文石之陸
遂直道家之山長倩議論有餘詳試左馮之政次公治
行第一首馳西漢之聲某鄉社相隣賓壻未步言如良
藥願見枕中鴻寶之書祿必素餐免坐柱後惠文之法

與饒州唐舍人啟

公堂懸榻記陳雷膠漆之情便郡把麾託虞虢輔車之
勢退循誤渥端出游談恭惟某官英氣吐芒清襟邁往
千仞覩儀庭之瑞九聲揚間代之音紉金匱之圖書榮

然麟趾夾紫宸之香案卓爾螭坳由寵綸以專城有襦歌之載路嚴助勞侍從之事對以春秋文翁修學校之官比于齊魯某自揆德宇已閱歲華受一廛而為氓夙依廣廈潤九里而蒙福復竊餘波

賀張尚書啟

伏審命傳紫誥名得青氈復用張子房增西漢之氣象有若南宮括作周室之典刑置郵流行海宇呼舞恭惟某官量包廣博識判眇綿經綸自得于胸中糟粕不膠

於紙上掌建國之六典多士彈冠有興邦之一言宵人
斂衽粵從去魯誰不劇秦既摧偃月之堂即驗反風之
卜三接之際百神載驩我識履聲慶細旃之圖舊民瞻
巖石期寶鼎之調元必有超卓不羣之謀以振光榮莫
大之治公固自任非堯舜之道不陳人亦有云豈管晏
之功可許共竚施設一新見聞某賀履情深掃門跡阻
字踰華袞已叨薦禰之私物播大鈞願備鑄顏之列

賀何大諫啟

伏審制綸誕布從橐顯持名者實之賓久積稜稜之望
官以諫為職愈伸蹇蹇之忠邸狀所傳僉諧相慶恭惟
某官玉輝千仞樂奏九聲堯醲舜薰絕翰墨之畦逕周
情孔思酌道德之淵源自結眷知浸居言責幸聖主和
顏而納誨故爭臣造膝以陳詞卓爾不羣知鷹鷂之逐
鳥爵去其太甚當豺狼不問狐狸欲崇丹甌之權迺峻
青蒲之拜儒先益進善類焉依視越人之瘠肥孰疑陽
子見鄭公之嫵媚必相唐宗某跡遠雞翹喜同燕賀號

五雲體疊榮謙牘之藏封萬戶侯未快賓階之覩

賀朱中丞啟

伏審命播楓宸位尊柏寺幾年弄印上曰無以易堯一角裁冠仕者皆嚴憚黯幅員相語網紀畢張恭惟某官天壤蜚英山川稽瑞適堯舜帝王之道入淵騫德行之科茹古涵今後學者有所統弼中彪外諸大夫皆曰賢若時題品之公自奮功名之會振爭臣七人之職踐御史三院之班志在擊邪如鷹鷂之逐鳥雀事先去甚當

豺狼不問狐狸奉簡以聞垂紳皆震積此立朝之望隱
然執法之除虛位揖第一人具瞻獨坐籠街過三百步
孰敢並行少倚風霜寔階霖雨某獲觀除目偶抗塵容
因筆墨以貢詞情均燕厦想簪路之贊喜望隔龍門

賀楊尚書啟

伏審命出法宮位高常伯夏官其屬六十久虛司馬之
稱武王有臣三千斯掌戎車之政郵籤四達輿誦一同
恭惟某官識濠經郛量函德宇雅音從律中金石于宮

商闊步離倫去翰墨之畦逕蚤颺聲于全蜀已減價于
他揚久矣韜光筮之遇泰青瑣初批于詔敕黃麻久演
于訓詞魚麗卿雲由漢未之有也上窺姚如下周者其
誰乎遂躋八座之尊仍領七兵之舊峻班聯于玉筍增
光焰于金蓮帝曰識公上星辰而聽履人期柄國作舟
楫以濟川某獲覩絲綸莫陪簪笏寵踰華袞嘗叨薦禰
之私氣轉洪鈞或有鑄顏之幸

賀王樞密啟

伏審法宮渙號右府居尊魁一星曰天樞有光乾象面
三槐者公位益峻巖瞻人傑延登頌聲騰踊恭惟某官
量吞陂頃識洞著叢健筆振奇飄飄有凌雲之氣清埃
擢穎赫赫乎逐日以新頃正色以入臺不俛眉而媚竈
上既知其直道人爭仰于令名暨琴瑟之更張見棟梁
之巨用尊朝之始舉國相驩置郵流行追大誥三盤之
作樞機周密如神爵五鳳之時偶生疆場之疑頗有甲
兵之問心在王室請使者之長纓口伐可汗戢武人之

蕭斧至自朔漠安若泰山王言大哉立冠籌帷之上相
尊等耳名參台鼎之間凡此寰瀛期于霖雨某情深躍
治迹阻班庭萬里折衝共慶精神之壯四子講德願贊
股肱之良

賀沈舍人啟

伏審命播朝昕恩隆接畫鳳閣目舍人之樣快覩黃麻
史官重宰相之權兼提直筆時有得賢之慶士歆稽古
之榮恭惟某官樂奏九韶玉輝千仞遑辭行遠屈宋當

得作衙官廣譽離倫曹陸羞稱于童子獨當文陣連中
儒科代言已妙于六題舉世皆期于三字久徊翔而難
進會總攬而彙征海中有蓬瀛作英躔之領袖李下無
蹊逕振公道于銓衡方四禁之簡材為九重而起草煥
星斗文章之麗鼓雷風號令之傳夫惟思若涌泉然後
言如出綉虞夏之書渾渾爾可以齊驅伊望之業凜凜
乎行將爰立某自睽符采屢變律筭三人同行有我師
嘗扳逸軌千里其外曰旬服幸借末光願崖略于賢書

免沈迷于吏牘茲因贊喜庸敢投誠

回甄教授啟

伏審主盟儒道領職校官枉汗竹以見貽知戍瓜之已
及伏惟某官器非近用學總異聞蚤塞月窟之芳大振
雷門之響未通閨籍來續序音六七子之詠暮春正虛
品藻二千石不如逢掖迺得楷模已擊節于鴻文更傾
心于缺願言強飭以速問津

回張信陽啟

登仲宣之樓正遠懷於吾土光陸君之佩乃更治于富
州未講一行之書徒銘四益之德伏惟某官飛談蒼霧
逸氣橫秋學本本以洽聞才多多而益辨為繭絲于保
障已播歡聲離鵲鷦之風塵倚看長翮某來遊珂里尚
隔瑶林願聞拔薤之規庶追伐檀之刺

回嚴州樊察院啟

寄耳目之臺久留封外治股肱之郡密通日邊風采一
新耄倪相慶恭惟某官道推先覺節挺後凋探聖域之

奧篇聲諧韶護首英躍于淡墨名震京師惟卷舒不隨
乎時故否泰各反其類解絃之始冠豸甚休去義府雙
闕之前未伸直氣居元禮八俊之上遠振芳埃與人俟
調鼎之期釣瀨非黔突之地某粵從志學固已仰高庭
尚隅于貢綦壤幸連于魯柝兩岐秀麥浸聞鄰富之謠
七月食瓜有賴餘波之潤

盤洲文集卷五十八

欽定四庫全書

盤洲文集卷五十九

宋 洪适 撰

啟八

與太平州周侍郎啟

北斗仰韓舊矣執鞭之慕餘波及晉閣馬貢牘之儀輒
干禁瑣之尊少贖後時之罪恭惟某官材優王佐學冠
儒流蚤登清切之班雅負經綸之志席前奉簡與秋霜

而爭巖柱下濡毫藏名山而不朽直躬獨步繇宇具瞻
不勝衆楚之咻自適一丘之樂迨更張于琴瑟方復拜
于旂旒迺陟天官仍司東學真賢去位不稅冕于當時
多士叩閭有舉幡之故事遠襲陽公之迹具存柳子之
書惟道大而不容必天定而能勝屢專名郡以利斯民
凝燕寢之香少煩重外作巨川之楫行且處中某流落
之餘沈迷于此小侯事大國正勤鄉往之私清渭分濁
涇庶託品題之末

賀饒州周侍郎啟

伏審秋浦政成受白髮龐眉之餞螺洲頌作喜朱轡皂
蓋之來初令一新英聲四達恭惟某官文穿月脇名埒
斗魁闢豹管之一斑衆知退步讀韋編而三絕久積多
聞既挺拔于俊躔遂表儀于侍橐典選振山公之啟披
文彰乃姓之非自出帝城屢專民社茲鳴珂之密通同
衣繡而少留君薄淮陽耶方凝旒之重外誰踰仲卿者
必補袞以處中某頃隔珠庭幾周玉燭薰葭盻倚嘗分

芸閣之光桑梓未恭又賴瓜疇之潤

賀吏部沈侍郎啟

伏審顯盼帝制真貳天官黃麻似六經寶璐已高于紙
價青氈曰舊物精金遂煥于帶圍郎狀播傳儒流散艷
恭惟某官人中間氣天上謫仙以昂霄聳壑之材有斂
錫焯鋒之器淵源道德異乎綆短以及深星斗文章所
謂芒寒而色正茲重闕于紫闥因小憩于西垣魚麗卿
雲由漢未之有也上窺姚如下周者其誰乎凜封詔之

直聲見改絃之公道欲草三銓之弊復思一代之英藻
鑑既精甄陶可必某情深賀履跡阻登門塊扎之播大
鈞既聞興誦吹噓而起窮羽有待片言

賀汪侍御啟

伏審正色左臺御史聳殿中之職拜榮南榻惠文光柱
後之儀風采益尊見聞皆震恭惟某官寶侔鼂采譽冠
月評堯鵬舜薰絕翰墨之畦逕周情孔思酌道德之淵
源自秘府之校文以清埃而露穎一言寤意共高憂國

之風六察分官即有事端之語如鷹鷂之必逐鳥爵當
豺狼則不問狐狸白簡凝霜方宵人之落胆巨川作楫
期良弼以調元某賀履情深掃門迹阻齒牙借譽每叨
華袞之褒羽翮問程有待洪鈞之播

賀陳察院啟

伏審出綽法宮振纓憲府由太史而為御史四海聳聞
遷元方而召季方一門鼎盛輒裁小牘以述僉言恭惟
某官樂奏九韶光分五緯休揚令問赫赫乎逐日以新

刊落陳言飄飄有凌雲之氣遠邇爭傳于師說卷舒豈
自于人為逢解紃之清明果著鞭而蹕厲既登文石之
陛遂陟道家之山金馬迭居丕變上車之諺皂鵬始擊
具瞻冠豸之威少煩明目張胆于歲月之間即見聚精
會神于槐楓之上某搖心函丈洗耳速郵聞伯夷之風
再三立懦效貢公之喜萬一噓枯

賀陳殿院啟

伏審出言法坐進步憲臺山岳動搖已振豸冠之職夔

龍接遙益崇鷺羽之班朝尊端人士作嘉頌恭惟某官
量涵德宇識邃經邦執古道之權衡諧正聲于韶濩望
傾後學仰北斗之垂光名滿縣區軋魁星而齊色遲徊
久矣問譽沛然自復入于帝城即高驤于朝路西崑影
組居張率之清官東觀紬書稱董狐之良史暫騫粉省
嘗次黃樞俯從六察之游茲慶副端之拜人中屈軼惟
直指于曲邪柱後惠文咸具瞻于剛介風霜是畏霖雨
可期某獲覩速郵正拘左契捉衿步武莫勤倒屣之迎

貢牘搖心敢贊典籤之喜

賀禮部金侍郎啟

伏審顯膺明制進陟清班監二代以從周上方稽古典
三禮而洛伯時可恤功遠暨連郵畧無異論恭惟某官
逢原貫變挺操剛方白日青天擴高明于輿阜黃鐘大
呂備和粹于律同頃正色以入臺不俛首而媚竈鵬鷺
匪衆禽之偶豺狼空當路之羣惟道大而不容故天定
而能勝尊朝之始通國相歡果聞前席之談妙簡細旃

之聽臯陶為理解禁網以破觚伯臣司宗告官箴于執
玉共期調變以慶榮懷茲逢荷橐之除尚謂出綸之晚
某備員仁里借潤榮河仰先達之姓名如瞻箕斗遙下
陳之賓客正隔雲泥

與交代沈正言啟

伏審簡在淵衷改臨輔郡告舊尹之政媿此一麾採遊
童之謠期于五袴先聲所暨公論咸歸恭惟某官星斗
吐芒隨和稽瑞以習是勝非之學為閩中肆外之文卓

爾昂霄壁千仞而獨立淵然韜世陂萬頃以有容自高
羽翮之程無藉齒牙之譽憲臺冠豸嘗振職于風霜諫
紙嬰鱗豈竄名于雷電少遲簪筆不鄙建旗潤九里而
福京師雖倚賢能之力先一州而後天下恐非君相之
心寧俟突黔即迎環賜某已書下考無補秋毫久馳慕
蘭之誠尚阻識韓之願積薪居上固揚秕之可輕解瑟
更張蓋匿瑕之有望

回張侍郎謝送登科記啟

伏以錢萬選而中品事播家聲佛千名以作經望尊時
傑會粹甫成于輶本發揮猥辱于賞音華袞可踰英瑤
何報恭惟某官識窮萬戶語妙二京上軋漢周擅燕公
之大手高出晉魏信籍也之善鳴蚤濟美于八科疊賜
芳于兩穗盜環決獄蔑聞天下之冤簪筆立班有美省
中之語某空疎不學編剗非才一卷之書必立師既阻
得三之問尺牘所傳以為法永誇儷六之藏

賀刑部張侍郎啟

拜命嚴宸升華禁路方君行仁政已見朝令之更欲下
無冤民尤重秋官之寄除音所洽善類相欣恭惟某官
學洞丘墳文摛黼黻黃鐘大呂函和粹于律同白日青
天仰高明于輿阜蚤摘髭于上第宜策足于要津久矣
徊翔沛然譽處暨清朝而解瑟先望士而握蘭孝宣中
興工既精于技巧臯陶為理刑幾措于纍囚茲慶出綸
遂榮持橐仁人既進解禁罔以破觚輿論所期濟巨川
而作楫某久違崇仞快覩速郵貢牘搖心敢贊典籤之

喜捉衿布武莫勤倒屣之迎

回蔣通判啟

幾年聆德固望岫以搖心千里寄聲若揮談而對面深
銘永好深激私情伏惟某官智術疏通吏材英發盤錯
素彰于利器委蛇無媿于素絲歌別駕之功嘗翱翔于
名郡下封軺之召即凌厲于榮涂某邈在山城闊然賓
序鳳毛獨秀既欣王事之同鴈足遠飛莫報書郵之况

賀吏部凌侍郎啟

伏審中宸作命小宰得賢并九里之潤以福京師効稱
異等掌六典之貳以治官府衆孰間言恭惟某官敏德
昭隣清規出類黃鐘大呂叅懈律以含和北斗泰山偃
儒紳而蹈景自解絃而更化即結綬以立班螭均獨擅
于史才鳳閣共推于文樣正朝夕論思之美卓爾得君
以春秋褒貶之嚴翩然出畫連得三刀之益中提六蠹
之權峴首颺聲說輕裘之叔子昭亭覓句接澄練于玄
暉政成當五月之初環賜出九天之上少煩清鑒丕變

樊源前馬後盧寒素洽彈冠之喜左周右召通遐指調
鼎之期某滌耳速郵搔心賀履小侯事大國兩分東壁
之光他日有殊恩倘涉西階之級

賀吏部汪侍郎啟

伏審大昕疏寵小宰立班李下無蹊賴典銓之清鑒遂
上有徑迂傳命于速郵賢者尊朝人皆賀野恭惟某官
中興間氣元精佐臣河目龜文應乾坤之上瑞金口木
舌集聖賢之大成自首中于鼎科宜立登于要路不能

媚竈過即引舟易地而贊黃堂再斯可矣計年而得朱
紱一何鈍耶會泰道之改絃入英躔而影組剛腸故在
直氣不回屢彈造膝之忠又復乞身而去坐看巧宦躡
取美官老之藏道之蓬領袖久推于虞監周曰庠夏曰
校範模孰出于陽公茲聯筆橐之榮少愜簪紳之望掌
六典之貳以治邦國固已逢辰遂萬物之宜而理陰陽
其誰舍我某情深仰斗迹阻披雲垓北之播大鈞必收
棄物吹噓而起窮羽敢幸表言

江東提舉謝宰執啟

影組王畿突不黔而避舍乘輶鄉部印已佩而入疆銜
德泰階貢誠小牘伏念某生而能薄仕則數竒自解瑟
之更張兩建旗而無補四牡懷歸于周道已叨就日之
榮六鷁退飛于宋都誰歟去天之遠重來江介豈應星
文陟彼景山籠厥槍旗之利亦有高廩察其雀鼠之欺
所懼弱材難逃大譴此蓋伏遇某官純誠弼后善計安
邦以公道而提衡為儒冠之司命大采細桷固非繩墨

之分後鴈前鴻併受羽毛之賜乃如謏薄亦玷皇華某
敢不自策疲駑靡忘夙夜茁牛羊而已矣當服官箴問
錢穀之幾何敢為文具

謝前平江朱舍人啟

引車避道望浸遠于日邊夸組入鄉迹不離于江表謙
槩已尊于四益報章有覩于七襄伏念某極陋至愚數
竒不偶稍整傷弓之羽再慙賣劍之風過鳳闕以乘軺
未能黔突遇鵠原之剖竹不暇褰帷官名幸得于舊疆

宦路仍尋于故步雖云食祿之有地頗似販漿而值涼
鞅掌之初幘幘是賴恭惟某官堪輿嘉瑞筆橐前英魚
麗卿雲獨颺聲于藝圃上窺姚姒早出樣于綸闈中遭
偃月之讒久蟄衝星之氣會法宮之總攬起盤谷以騰
振連把一麾咸歌五袴澄江練淨孰追逐于高吟燕寢
香凝復芬芳于故事品藻每私于賤子皇華遂點于外
臺倘非良藥之規寧免素餐之責某始叨誤渥謂借末
光未報雙魚同作去吳之客重瞻疊障但思事楚之時

賀中書虞舍人啟

伏審逢辰得志接晝疏恩螭頭記天子之言久藏金匱
鳳閣目舍人之樣真觀氷銜士歆稽古之榮朝享用賢
之福恭惟某官瑞浮玉壘學禪金籙酌道德之淵源高
眎千古絕翰墨之畦逕自成一家遠陟王城即登冊府
身為國史濃薰班氏之香口伐可汗不屈漢庭之節既
判花而試可宜鳴玉以躋華况邊塵牙孽之秋賴禁瑣
論思之傑山東聽詔使扶杖有感奮之心淮南寢謀無

發蒙相冊笑之語得人之效從昔為然少煩襲六之辭
共恢畫一之治虞夏之書渾渾爾孰敢並驅伊望之業
凜凜乎自然平步某契緣雁塔好重鵠原甫睽隔于趨
隅竊瞻翹于賀厦寵踰華袞已叨一字之褒綸氣轉一
鈞必念八荒之棄物

賀劉制置啟

伏審誕揚帝制寵建使名匈奴不滅無以家為壯懷舊
矣諸將于是皆以兵屬初令聳然對壘震驚提封呼僂

恭惟某官名聞華裔忠貫義蛾異表魁梧稟光暉于川
嶽羣書該洽講治亂于古今功既立于潁濱威遂傾于
松漠會姦臣之擅政主和議以銷兵養氣橫湘久鬱興
人之望建牙荆楚近分甸服之權高穹開悔禍之期強
敵倡敗盟之說九重赫怒諸道出師惟發縱指示之得
人則礫裂分犁之有日疇咨僉論無易元勳乃盡護于
列營冀中興于洪業戎車纔動敵騎潛奔仰多算之乘
機宜故都之迎蹕清中原而復濟已誓長江絕大漠以

暫勞即刊隆竭某自傳成命竊激懦衷聽綸巾羽扇之
談莫叅檄筆撫簞食壺漿之俗願竄辟書

賀劉右史啟

伏審命播域中班高柱下東觀為老氏之藏久振華纓
右史書人主之言共尊直筆朝有得賢之慶士歆稽古
之榮恭惟某官雅量測深清衿邁往龜千年而五總鶴
九臯而一鳴博物洽聞學周公仲尼之道同工異曲有
相如揚雄之風早模範于天枝已縱橫于制草不能媚

竈又復杜門既解瑟之更張始著鞭于嚴召賜諭縻之
墨文已應星裁獬豸之冠勢能搖岳作英游之領袖騰
廣譽于薦紳黃屋深知赤墀親擢人瑞有鄭仁表侍素
齊眉古事問高仲舒舊羶唾手某不瞻芝采屢變葭灰
捉刺就階近失拜塵之禮裁緘賀厦預欣躍冶之期

賀戶部劉侍郎啟

伏審寵趨名節歸冠從班乃立地官以佐王卓然振職
不有君子其能國僉曰得人恭惟某官天壤知名山川

稽瑞飛談蒼霧一坐盡傾遊刃發硎千人皆廢蚤乘槎
而縱壑已簪筆而立朝何物含沙厄風波之洶湧幾年
如蠱閱嵐障之卷舒金百鍊而繞指不柔玉三獻而則
足非罪會改絃之盛際即植纛于价藩長城方倚于壯
猷綠野忽濃于歸興惟貨財源流本末未易虛談況金
草沸渭汾沄有加常費既左支右吾之不給且上溢下
漏之孔多言利而析秋毫詎堪俗吏思政而勞旰食孰
慰淵衷倘非心計之英定有頭會之患上能圖舊公必

光前蓋舉偏補弊而多寡得宜則散滯取盈而公私稱
足算鞭擬古豈管晏之功復許乎朽貫指期匪晉楚之
富可及也更須碩畫同却妖氛素聞倜儻之風必越拘
攣之見使中原遂脫于左衽斯兩地益美于舊疆采之
公言敢為累句某誠深仰斗迹阻披雲泰階有六符之
經具瞻調燮蟠木為萬乘之器竊異選掄

盤洲文集卷五十九